

Suliffeerunnermi ikorsiissutit pillugit inatsisartut inatsisaat nr. 2, 15. maj 2014-imeersoq

Kapitali 1

Nassuaatit

§ 1. Nammineq pisuussutigalugu suliffeerunneq ima paasisariaqarpoq, inuk naammaginartumik tunngavissaqarnani suliffimminit soraarpat imaluunniit suliffini qimappagu imaluunniit nammineq inuttut atukkani peqqutigalugit soraarsitaappat. Qinnuteqartoq nammineq pisuussuteqarluni suliffeerussimanersoq kommunalbestyrelsip aalajangissavaa.

§ 2. Inuk sulinermik inuussutissarsiortutut isigineqartartoq tassaavoq, suliffiutilimmi akissarsiat pillugit isumaqtigiissutit imaluunniit isumaqtigiissuteqarluni suliffeqartoq, taassumalu ilitsersuutai malillugit sulisuuusoq.

§ 3. Sulinermigut imminut pilersorsinnaasutit isigineqarpoq, killilersuuteqarnani piffissaq tamaat sulisinnaasoq imaluunniit piginnaanngorsarniarluni neqeroorummik innersunneqarsimasoq, inuk suliffissaqartitsiniarnermi sulisinnaasutut isigineqarsinnaammatt.

§ 4. Tunisassiornermik unitsitsineq tassaavoq tunisassianik amigaateqarneq, maskiinanik ajutoorneq, silarlunneq imaluunniit pissutsit assingusut siumut ilisimaneqanngitsut peqqutigalugit tunisassiornermik unitsitsineq, taassumalu malitsigisaanik sulisunik angerlartitsineqarluni. Angerlartitsisarneq pillugu malittarisassat taamaallaat nunami tunisassiorfinnik atuinermi atorneqartarput.

Kapitali 2

Piumasaqaatit nalinginnaasut

§ 5. Suliffeerunnermi ikorsiissutit sulinermik inuussutissarsiutilinnut tunniunneqartarput, nammineq pisuussutiginagu suliffeerunneq, angerlartinneqarneq imaluunniit napparsimaneq peqqutigalugu isertitanik annaasaqarnermut taarsiissutit tunniunneqartarlutik.

§ 6. Suliffeerunnermi ikorsiissutit communalbestyrelsimit akilerneqartarput, suliffeequuttoq angerlartinneqarsimasoq imaluunniit napparsimasoq communalbestyrelsimit saaffiginninnermini kapitali 3-mi imaluunniit kapitali 4-mi piumasaqaatit eqquutsissimallugit communalbestyrelsimit saaffiginnikkangat, tamakkulu saniatigut piumasaqaatit makku eqquutsissimagaanni:

1) 18-inik ukioqalersimagaanni imaluunniit pilersuisuugaanni,

2) Kalaallit Nunaanni inuit allattorsimaffiannut nalunaarsorsimagaanni, aamma
3) sapaatit akunneri kingulliit 13-it sulinermik inuussutissarsiutilittut sulisimagaanni,
piffissamilu tassani ikinnerpaamik nalunaaquttap akunnerini 182-ini sulisimagaanni. Piffissat
suliffeqannginnermi ikorsiissutinik pissarsiffiusartut suliffeqarnermi katersinertut
isigineqartanngillat.

Imm. 2. Inuit tunisassiornerup unitsinneqarnera imaluunniit taassuma malitsigisai peqqutigalugit angerlartinneqartoq, suliffissaqartitsinermilu sulisinnaassuseqartoq imaluunniit piginnaanngorsarneqarsinnaasoq, Inatsisartut inatsisaanni matumani malittarisassat malillugit suliffeerunnermi ikorsiissutinik pissarsisinnaatitaavoq. Angerlartinneqarsimaneq sulisitsisumit allakkatigut uppermarsarneqassaaq. Allakkatigut uppermarsaat elektroniskisut tunniunneqarsinnaavoq.

Imm. 3. Sulisitsisoq piaaraluni imaluunniit mianersuaalliorujussuarnikkut angerlatsitsisimaneq pillugu kukkusumik uppermarsaasersimappagu, tamannalu pissutissaqanngitsumik suliffeerunnermi ikorsiissutinik tunniussisimanermut kinguneqarsimappat, communalbestyrelsi suliffeerunnermi ikorsiissutit tunniunneqarsimasut amerlaqqataannik sulisitsisumit akileqqullugit piumasaqarsinnaavoq.

Imm. 4. Aaqqiissut angerlartitaasunut tunisassiornerup unitsinneqarnera peqqutigalugu angerlartinneqarsimanerminnut atatillugu akissarsiaqartunutt imaluunniit allatut isertitaqartartunut atuutsinneqartanngilaq.

Imm. 5. Maleruagassami matumani piumasaqaatit qinnuteqartup eqquutsinnerai pillugit communalbestyrelsip aalajangertassavai.

§ 7. Suliffissaaleqisut, angerlartitaasut imaluunniit napparsimasut isertitanut taarsiullugu pisortanit allatut ikorsiissutinik pissarsisartut, imaluunniit pinerluuteqarsimasunik nakkutilliisoqarfip imaluunniit isumaginninnerup ataani sullivinnit nakkutigineqartut, suliffeerunnermi ikorsiissutinik pissarsinissaminnut pisussaatitaanngillat.

Kapitali 3

Suliffissaaleqinerup nalaani ikorsiissutit aamma angerlartitaasarneq

§ 8. Suliffissaaleqisut aamma angerlartitaasimasut communalbestyrelsimit saaffiginnittut ilitsersunneqarnissaminnut pisussaaffeqartitaapput.

Imm. 2. Kommunalbestyrelsi suliffissaaleqisoq imaluunniit angerlartitaasimasoq peqatigalugit immikkut iliuusissatut pilersaarummik suliaqassaaq, takuulli imm. 4.

Imm. 3. Iliuusissatut pilersaarut eqqarsaatigisassanik arlaannik makkuninnga imaqartussaavoq:

1) Suliffissatigut periarfissat imaluunniit piginnaanngorsarnissaq, atuaqqinnissaq imaluunniit

ilinnialernissamut periarfissat pillugit ilitsersuussineq.

2) Suliffissamik innersuussineq.

3) Kommunip sammisassaqartitsinikkut suliffissaqartitsinikkullu neqeroorutinik aallartissimasaanik innersuussineq.

4) Pikkorissarnernik piginnaanngorsaataasunik innersuussineq.

Imm. 4. Taamaattorli § 4 malillugu angerlartinneqarsimasut immikkut ittumik iliuusissatut pilersaarummik suliarinniffiqeqassangillat, angerlartinneqarsimaneq sivisunerpaaqik ullunik 14-inik sivisussuseqassappat.

Imm. 5. Immikkut ittumik iliuusissatut pilersaarutip suliffeqanngitsoq imaluunniit angerlartinneqarsimasoq malinnaaffigissavaa, taanna pineqartoq inatsisit allat malillugit ikorsiissutinik pisartagaqalerternut ikaarsaariaraangat, inatsimmi allami taamattaaq immikkut ittumik iliuusissatut pileraaruteqarnissamut piumasaqaateqarpat imaluunniit piginnaanngorsaanissamut pilersaarummik piumasaqaateqartoqarpat. Taama pisoqassappat, inatsit alla malillugu immikkut iliuusissatut pilersaarutip imaluunniit piginnaanngorsaanissamut pilersaarutip immikkut ittumik iliuusissatut pilersaarut suliarineqareersimasoq aallaavigissavaa.

Imm. 6. Iliuusissatut pileraarut pisariaqartitsineq malillugu nalilorseqassaaq nutarterneqarlunilu.

Imm. 7. Suliffeerunnermi ikorsiissutinik qinnuteqartunut immikkut ittumik iliuusissatut pileraarutit pillugit Naalakkersuisut maleruagassanik erseqqinnerusunik aalajangersaasinnaapput.

§ 9. Suliffeerunnerup imaluunniit angerlartitaanerup nalaani suliffeerunnermi angerlartitaanerup kingorna imaluunniit suliffeerunnerup aallartinnerani ullormit saaffiginninnerup siulliup aallartinneranit suliffeerunnermi ikorsiissutinik tunniussineqartassaaq.

Imm. 2. Suliffeerunnermi ikorsiissutit katillugit sapaatit akunnerini 13-ini tunniunneqartassapput.

Imm. 3. Suliffeerunnermi ikorsiissutit ima pisoqarneranit apeqqutaatinneqassapput:

1) suliffissaaleqisoq imaluunniit angerlartitaasoq sulinermik inuussutissarsiorsinnaassaaq suliffissaqartitsiniarnermilu sulileriaannaasussaalluni, aamma

2) suliffeerunneq nammineq pisuussutigissanngilaa, tak. § 1.

Imm. 4. Suliffeerunnermi ikorsiissutinik pissarsiaqartoq piffissami suliffeerunnermi ikorsiissutinik pissarsinerup nalaani ulluni ataasiakkaani akissarsianik isertitaqarsimappat suliffeerunnermi ikorsiissutit ikilisinneqassapput. Suliffeerunnermi ikorsiissutinik pissarsisumut suut iluaqutaanerunersut apeqqutigitillugit, suliffeerunnermi ikorsissutit taassumunnga ima ilillugit ikilisinnaannik toqqaaneqarsinnaavoq:

1) ulluni qanoq amerlatigisuni akissarsiaqarluni isertitaqarsimaneq malillugu, imaluunniit
2) aningaasat qanoq amerlatigisut tunniunneqarsimanersut malillugit.

Imm. 5. Suliffeerunnermi ikorsiissutini qinnuteqartumut sulilersinnaanermut pisussaaffit pillugit Naalakkersuisut maleruagassanik erseqqinnerusunik aalajangersaasinnaapput.

Kapitali 4

Napparsimanerup nalaani suliffeerunnermi ikorsiissutinik pissarsisarneq

§ 10. Inuk sulisinnaajunnaarnermik kinguneqartumik napparsimanermi nalaani suliffeerunnermi ikorsiissutinik pissarsisinnaavoq. Inuup suliffissaqartitsiniarnermi sulileriataarsinnaajunnaarallarnini pillugu kommunalbestyrelsimit nalunaarutigissavaa.

Imm. 2. Napparsimanerup nalaani suliffeerunnermi ikorsiissutit napparsimanerup ulluisa pingajuat aallarnerfigalugu tunniunneqassapput. Suliffissaaleqisut aamma angerlartitaasimasut suliffeerunnerup nalaani ikorsiissutinik pisartagaqareersut suliffeerunnermi ikorsiissutinik kipinertaqanngitsumilli pissarsisarnerat ingerlaannassaaq.

Imm. 3. Taamaattorli napparsimaneq sapaatit akunnerinik marlunnik (2) sivisunerusumilluunniit sivisunerussappat, imaluunniit sulinermi ajoquusersimanermik kinguneqarsimappat, ikorsiissutit napparsimanerup ulluanit siullermit tunniunneqassapput. Sulinermi ajoquusersimanermut atatillugu suliffeerunnermi ikorsiissutinik tunniussisarneq sulinermi ajoquusernerup aallartiinnarneranut uiggiutiinnarlugu napparsimanerup nalaani tunniunneqassapput.

Imm. 4. Suliffeerunnermi ikorsiissutinik pissarsiaqartoq nappsimajunnaarneq aallartiinnartoq kommunalbestyrelsimit nalanaarutiginnissalluni pisussaatitaavoq.

Imm. 5. Suliffissaarunnermi ikorsiissutit sapaatip akunnerini 13 ikorsiissutigineqarsinnaapput.

§ 11. Sapaatit akunneri pingasut sinnerlugit nappsimanermi imaluunniit sivikitsukkuutaanik nappsimasutut nalunaarutiginnikulaartoqarnerani inuk taanna pineqartoq ikorsiissutinik allanik pissarsisartussatut ikaarsaassanersoq kommunalbestyrelsip nalilissavaa.

§ 12. Suliffeerunnermi ikorsiissutinik pissarsisartup nakorsamit uppermarsaammik takutitsinissaa kommunalbestyrelsip piumasarisinnaavaa.

Imm. 2. Nakorsamit uppermarsaammut aningaasartuutit, tak. imm. 1, kommunalbestyrelsimit akilerneqassapput.

Kapitali 5

Pineqaatissiisarnernut aalajangersakkat

§ 13. Suliffeerunnermi ikorsiissutinik pissarsiat tunniuttarnerini pineqaatissiissutit sapaatit akunnerini sisamani (4) tunniunneqannginnissaat pillugit kommunalbestyrelsei aalajangiisinnaavoq, suliffissaaleqisoq imaluunniit angerlartitaasimasoq ima iliopat:

- 1) immikkut ittumik iliuusissatut pilersaarummik suliarinninnissamut peqataarusunngippat, tak. § 8, imm. 2,
- 2) atorsinnaasumik peqqutissaqarnani suliffimmut innersuunneqarsimasumut sulilerusunngippat,
- 3) atorsinnaasumik peqqutissaqarnani suliffimmut innersuunneqarsimasumut takkutinngitsorpat,
- 4) atorsinnaasumik peqqutissaqarnani sammisassaqtitsiniarnermi, suliffissaqtitsiniarnermi imaluunniit piginnaanngorsarneqarnissamut neqeroorut isumaqatigiissuteqarfigineqarsimasoq orniguffiginnngippagu, imaluunniit
- 5) napparsimanerup qanngiussimanera pillugu ingerlaannartumik napparsimajunnaarsimasutut nalunaarutiginnngippat.

Imm. 2. Angerlartinneqarsimasup suliffik innersuunneqarsimasoq suliffigilissallugu pisussaaffeqarpoq, naak tamanna atorfekartitaanermi pissutit atutereersut taamaatinnissaannik kinguneqassagaluarpualluunniit.

Imm. 3. Piffissap pineqaatissinneqarsimanermik kinguneqartoq taamaatippat, tak. imm. 1, suliffissaaleqisoq imaluunniit angerlartitaasimasoq suliffeerunnermi ikorsiissutinik pissarsinissaminut pisinnaatitaavoq, § 6, imm. 1 aamma 2-mi, kiisalu § 9, imm. 3-mi piumasaqaatit eqquutsinneqarsimappata.

Imm. 4. Suliffissaaleqisoq imaluunniit angerlartinneqarsimasoq piffissap pineqaatissinneqarnerup taamaatinnerani imm. 1-imi pisussaaffit allassimasut suli imaluunniit aammaarluni eqquutsikkusunngippagit, pineqartoq suliffissaqtitsiniarnermi suleriaannaasutut isigineqarunnaassaaq, tamatumalu kingunerisaanik suliffeerunnermi ikorsiissutinik pissarsisinnaatitaanini annaassallugu.

Kapitali 6

Suliffeerunnermi ikorsiissutit amerlassusii tunniussisarnerlu

§ 14. Suliffeerunnermi ikorsiissutit nalunaaquttap akunneranut aalajangersimasumik akeqartitsinikkut tunniunneqartapoq, taakku tassaallutik sulisartut ilinniarsimannngitsut pillugit akissarsiat pillugit SIK’p aamma Naalakkersuisut akornanni isumaqatigiissutit malillugit akissarsiat ikinnerpaaffiisa 90 %-ii, tak. imm. 3.

Imm. 2. Suliffeerunnermi ikorsiissutit naatsorsorneqartarput nalunaaquttap akunneri sulinermerik inuussutissarsiuteqartup sapaatit akunnerini kingullerni 13-ini suliffeqarsimanera tunngavigalugu, ullullu 14-ikaartumik kingumut tunniunneqartussaallutik, amerlanerpaamilli sapaatit akunnerannut nalunaaquttap akunneri 40-t.

Imm. 3. Imm. 1 malillugu nalunaaquttap akunneranut akiliutitut akigitinneqartussat nutaat Naalakkersuisut aamma SIK-p akornanni akissarsiat pillugit isumaqatigiissutaasa allanngortinneqarnerisa piaartumik kinguninngua Naalakkersuisut tamanut saqqummiutissavaat.

Imm. 4. Nalunaaquttap akunneranut akiliutitut akigitinneqartussat nutaat tamanut saqqummiunneqarsimanerisa kingorna ataasinngornerup siulliani atuutsinnejalissapput.

Kapitali 7

Nalunaarutiginnittussaatitaaneq aamma utertitsilluni akiliisarneq

§ 15. Suliffeerunnermi ikorsiissutinik pissarsisartup nammineq inuunermini atukkamini allannguutit suliffeerunnermi ikorsiissutinik ikilisaanermik, taamaatitsinissamik imaluunniit utertitsilluni akilertariaqarnerinik kinguneqarsinnaasut pillugit communalbestyrelsimit nalunaarutiginninnissaminut pisussaaffeqarpoq.

Imm. 2. Kommunalbestyrelsi, inatsisit allat tamatuminnga aporfissaqartitsinngippata, paasissutissanik pisortanit allanit pissarsiorsinnaavoq, tassani nalilerneqassamat pissutsit suliffeerunnermi ikorsiissutinik pissarsisartoq suliffeerunnermi ikorsiissutinik pissarsinissaminut pisussaaffeerussimanersoq nalilerneqassalluni.

§ 16. Inuk suliffeerunnermi ikorsiissutinik pissarsisartoq piffissami ataatsimi assinganillu siunertaqartumik suliffeerunnermi ikorsiissutinik pissarsisarsimanerup nalaani taarsiissutinik assigisaannilluunniit pissarsisimappat ikorsiissutinik tunniunneqarsimasunik utertitsilluni akiliuteqassanersoq communalbestyrelsip aalajangissavaa.

§ 17. Paasissutissat § 15, imm. 1-imi piumasarineqartut pillugit inuup nalunaarutigingitsoorsimappagit, imaluunniit ilisimalluarluarlugu pisussaaffeqarnani suliffeerunnermi ikorsiissutinik pissarsisarsimappat, utertitsilluni akiliuteqarnissaa pillugu communalbestyrelsi aalajangiisinnaavoq.

Kapitali 8

Aningaasalersuineq allaffissornikkullu aqutsineq

§ 18. Inatsisartut inatsisaat manna malillugu aningaasartuutit communalbestyrelsinit akilerneqartassapput.

Imm. 2. Suliffeerunnermi ikorsiissutit communalbestyrelsip sulinermik inuussutissarsiuteqartup kommunimi inuit allattorsimaffianni nalunaarsorsimaffianiittup akilertassavai.

Imm. 3. Suliffeerussimasoq imaluunniit angerlartitaasimasoq immikkut ittumik iliuusissatut pilersaarummik suliarinnittoqarsimanerata kingorna kommunimit nuuppat, kommunip nuuffigineqartup suliffeerussimasup imaluunniit angerlartitaasimasup immikkut ittumik iliuusissatut pilersaarut kommunimit nuuffigineqarsimasumit pissarsiarissavai, suliffeerussimasoq imaluunniit angerlartitaasimasoq komunimut nuuffigisimasaminut saaffiginnippat pisariaqartitsinerit malillugit tulluussarneqarniassamat. Kommunip

nuunniikkut qimagoguffigineqarsimasup piumasaqarneq tiguniariaruniuk immikkut ittumik iliuusissatut pilersarut ingerlaannartumik kommunimut nuuffigineqarsimasumut nassiatissavaa.

Kapitali 9

Maalaaruteqarsinnaatitaaneq

§ 19. Kommunalbestyrelsip § 1, § 6, imm. 54, § 13, imm. 1, aamma §§ 16 aamma 17 malillugit aalajangersimasai Isumaginninnermi Maalaaruteqartarfimmut maalaarutigineqarsinnaapput.

Imm. 2. Maalaarummik tunniussinissamut piffissaliussaq tassaavoq aalajangikkap maalaarutigerusutap tigunerata kingorna sapaatit akunneri sisamat(4) qaangiutinnginnerini.


Kapitali 10

Atuutsinnejalerfissa aamma ikaarsaariarnermi aalajangersakkat

§ 20. Inatsisartut inatsisaat atuutsinnejalerfissa tassaavoq 1. juli 2014.

Imm. 2. Tamatumunnga ilutigitillugu suliffeerunnermi ikorsiissutit pillugit inatsisartut peqqussutaat nr. 5, 1. juni 2006-imeersoq atorunnaarsinneqarpooq.

Namminersorlutik Oqartussat ulloq 15. maj 2014


Aleqa Hammond